




Mzee Kichwa aita mkutano



Tusome Early Literacy Programme

Mzee Kichwa aita mkutano




Siku moja Mzee Kichwa aliita mkutano. Alitaka kusikiza malalamiko ya sehemu za mwili.

Mkutano ulikuwa kwake nyumbani kwenye kivuli cha mti.

Mzee Kichwa alianza kwa kumwita Jicho. Jicho alilalamika kuwa alisaidia binadamu kila mara lakini hakupata msaada wowote. Mzee Kichwa akamkumbusha Jicho kwamba hupata msaada kwa kulala usiku mzima.





Naye Kidevu akalalamika kuwa binadamu humnyoa kila wiki.


Shavu aliposikia hivyo akasema kuwa ana furaha kwani hapati chawa na vipele.

Hii ni kwa sababu binadamu humnyoa kidevu kila mara.

Kisogo akasema kuwa amewekwa nyuma na kusahuliwa.

Uso akamjibu kwa haraka kuwa yafaa afurahie hali yake. Yeye amelindwa kutokana na maovu.

Uso pia, akalalamika kuwa yeye huchoka kwa kubeba Kinywa, Pua na Macho.





Kidole naye akasema kuwa hufanyishwa kazi nyingi na wakati mwingine chafu.

Kichwa akamwambia kuwa anafaa kushukuru kwani husafishwa mara kwa mara.

Kichwa akamkumbusha kuwa hupokea chakula kabla ya wengine wote.

Pua alilalamika ya kuwa yeye hunusa hewa isiyo safi mara kwa mara.

Hewa hiyo humletea mafua.

Aliomba anunuliwe kitambaa cha kutolea makamasi kila wakati.





Mzee Kichwa aliposikia yote hayo, aliwaambia wote wachukue muda kufikiria mambo ambayo ni mazuri kuhusu maisha yao. Aliwaambia kuwa yeye hubeba uso, nywele, masikio, kinywa na pua bila kulalamika. Akasema kuwa yeye huwaongoza wote kwa furaha.



Wote walitazamana kwa aibu.

Kila mmoja akafikiria yote mazuri kujihusu. Wakamshukuru Mzee Kichwa kwa kuwashauri vyema na kila mmoja akaenda zake.

Maswali

1. Mkutano ulioitwa na Mzee Kichwa ulikuwa wapi?
2. Jicho alilalamika kwa kufanya kazi gani?
3. Taja mambo mawili ambayo kidole hupata.
4. Unafikiri kwa nini kichwa ndiye hufanya kazi nyingi kuliko wote?
5. Taja sehemu tatu za mwili ambazo hazikufika mkutanoni.

Mzee Kichwa aita mkutano

Kichwa anaita sehemu zingine za mwili kwenye mkutano. Sehemu hizi zinalalamika kwa kazi wanazozifanya. Je, Mzee kichwa anayapi ya kuelezea?



USAID
FROM THE AMERICAN PEOPLE



UKaid
from the British people

Kitabu hiki kimechapishwa kwa ufadhili kutoka kwa Shirika la maendeleo ya kimataifa la Marekani (USAID/Kenya) na Idara ya maendeleo ya kimataifa ya Uingereza (DFID/Kenya) kupitia mradi wa Tusome Early Grade Reading Activity.